

Prome Minister a presenta un comision di Aruba, pa duna informacion relaciona cu e caso di Natalee Holloway

ORANJESTAD(AAN):

Ayera mainta durante di conferencia di prensa di Gobierno, Prome Minister a haci un presentacion oficial di un comision cu a yuda ultimo dianan, rond di e caso di Holloway.

Segun Oduber, Gobierno a pidi gremionan den nos



comunidad, pa duna Gobierno un man pa atende cu e informacionnan cu hopi biaha ta na un manera negativo pa Aruba.

Prome Minister a splica cu tras di cortina e hendenan aki tabata tin algun tempo caba ta yuda pa locual ta tene e nomber di Aruba na haltu.

E mision basico di e grupo aki ta pa trece informacion di locual ta sosode, den e caso Holloway y ora cu sali p[ublicacionnan incorrecto, e grupo mester suministra e informacion corecto, haya for di e instituto oficial, dunando un splicacion di nos systema hudicial y pa atende cu prensa internacional.

Awor banda di prensa Mericano tin tambe prensa Hulandes cu a bin Aruba pa e caso Holloway.

E personanan cu ta forma parti di e grupo ta Ruben Trapenberg vocero di Gobierno, Bill Carson di CMB, Edwin Roos di Camara di Comercio, Greg Peterson di Zona Franca, nos ex Gobernador Olindo Koolman, sr Boujon, Jorge Pesquera di AHATA y Myrna Jansen di ATA.

E personana aki oficialmente lo por busca informacion na Polis of Ministerio Publico etc pa por duna e informacion corecto naprensa internacional, cu a yega di publica of rapporta diferente informacion incorrecto.

Ruben Trapenberg kende ta forma parti di e grupo aki a splica cu e grupo ta encarga entre otro pa busca un specislista riba cierto tereno pa duna informacion, si acaso no tin un miembro di e grupo cu tin tal experticio. Por ehempel si prensa Mericano kier informacion riba un aspecto di ley, e comision lo acerca un abogado pa duna un splicacion.